



Ilulissani imeqarfiup siunissami nunap qeriuannartup aakkiartuaarnerani atuutiinnarsinnaanera qulakkeerneqarsinnaanersoq kiisalu amittorsuup tasia imeqarfissatut periarfissatut tulluussinnaanersoq pillugu Naalakkersuisut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Aqqalu C. Jerimiassen, Atassut)

(Siullermeerneqarnera)

Qujanaq Inatsisartunut ilaasortaq Aqqalu C. Jerimiassen siunnersuummut.

Demokraatinut pingaartuuvoq, uagut inuiaqatigiittut eqqummaariffigijuassagipput innuttaasusut tunngaviusumik pisariaqartitaasa qulakkeerneqartuarnissaat. Tassunga assersuutaavoq imermik minguitsumik imersinnaaneq, kallerup inneqarnissaq, oqarasuaatinut internettimullu atuisinnaanissaq.

Taakku pingaaruteqarluinnartut pitsariaqarluinnarput, inuiaqatigiit nutaaliaasut ingerlanissaannut aammalu uagut inuttut ingerlanissatsinnut.

Siunnersuuteqartup uani tikkuarpaa, Ilulissani imermik pilersuineq ajornartorsiutaasinnasoq. Uani siunnersuuteqartup tunngavilersuutai issuassanngilakka, paasitiinnarusulluguli, taakku isumaqatigigakkit.

Tamanna tunngavigalugu tapersernartippara, nassuiaasoqassasoq, qanoq Ilulissani imermik pilersuineq siunissamut qulakkeerniarneqarnerasoq.

Siunnersuut ataatsimiititaliami attuumassuteqartumi suliareqqinneqarnissaa innersuussutigineqarpoq.